

KSN: Nik Ali tidak akan diambil tindakan
Malaysiakini.com
July 22, 2010

Ketua Setiausaha Negara Tan Sri Mohd Sidek Hassan berkata tiada sebarang tindakan akan diambil terhadap Pegawai Kemajuan Negeri Pulau Pinang Nik Ali Mat Yunus yang memberi kenyataan balas terhadap tuduhan Ketua Menteri Lim Guan Eng terhadapnya.

Beliau berkata Nik Ali perlu memberi penjelasan terhadap segala tuduhan berkenaan bagi mempertahankan dirinya.

"Kalau dia (Nik Ali) dituduh dengan perkara tidak benar dan dihentam berkali-kali, dia pun ada nilai diri, kalau dia tak jawab nanti orang kata dia bersalah, jadi wajarlah penjelasan diberikan," katanya pada sidang akhbar selepas merasmikan forum Garis Panduan Pemerolehan Nasional di Kuala Lumpur hari ini.

Laporan berita sebelum ini menyebut, ketegangan antara Lim dan Nik Ali timbul apabila Ketua Menteri tersebut didakwa beberapa kali mengeluarkan kenyataan menyerang pegawai terbabit.

Antaranya Lim dikatakan mendakwa pegawai berkenaan sebagai "tidak profesional, tidak kompeten, pengecut dan patut dipecat" berhubung isu curi pasir di Balik Pulau.

Dakwaan Lim itu menyebabkan Nik Ali tampil membuat kenyataan dalam media untuk mengkritik Ketua Menteri berkenaan dengan menyifatkannya sebagai biadab manakala tindakannya menyerang Pegawai Pembangunan Negeri itu telah merendahkan statusnya sebagai Ketua Menteri.

Mohd Sidek berkata Jemaah Menteri yang bermesyuarat semalam berpendapat perbuatan menghentam penjawat awam di khalayak ramai tentang perkara yang tidak benar adalah satu perkara yang patut dihentikan.

"Ketua Menteri tak sepatutnya menyalahkan Nik Ali kerana kerja-kerja tersebut bukan di bawah tanggungjawab beliau, kalau pun ada (kesalahan) tak perlu pergi kepada media dan menyalahkan seseorang itu.

"Lim sepatutnya pergi ke jabatan yang berkenaan menyatakan ini berlaku dan melalui saluran yang betul," katanya.

Ditanya mengenai dakwaan Nik Ali akan "dihalau" keluar dari negeri itu, Mohd Sidek berkata: "Itu satu kezaliman dan melampau, lagipun Nik Ali pegawai Persekutuan yang dihantar untuk mengetuai pejabat Persekutuan (di negeri itu). Saya amat takut kalau seseorang pemimpin berkelakuan begini," katanya.

- Bernama

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/138077>